

四庫全書

經部

欽定四庫全書

經部

儀禮集說卷十五

詳校官監察御史

臣李陽樸

侍讀

臣

孫球覆勘

總校官檢討

臣

何思鈞

校對官中書

臣

嵇承志

謄錄監生

臣

汪師曾

欽定四庫全書

儀禮集說卷十五

元 敖繼公 撰

特牲饋食禮第十五

注曰於五禮屬吉禮

繼公謂此篇言士祭其祖之禮

特牲饋食之禮

食音嗣

特牲謂豕也士祭用三鼎乃以特牲名之者主於牲

也少牢放此

不諏日

諏子
類反

諏謀也。諏日謂諏其所筮之日也。大夫將祭而筮有
諏日之禮。此云不諏日。則是祭禮之序先尊後卑。亦
可見矣。不諏日則所筮之日亦在旬之內矣。所以下於
大夫。少牢禮諏日用丁巳筮。旬有一日。

及筮日。主人冠端玄。卽位于門外西面。

注曰：冠端玄，冠玄端。門謂廟門。

繼公謂筮日，筮之日也。士筮當朝服。今乃玄端者，不

可踰其祭服也筮與祭皆與神交故主人之服不宜有異

子姓兄弟如主人之服立于主人之南西面北上

注曰小宗祭而兄弟皆來與焉宗子祭則族人皆侍繼公謂子姓主人之子也言子復言姓未詳其意先子姓而後兄弟蓋以主人之服親疏為序也若行禮之次則自長者始是時子姓而下之服亦玄端統於主人也

有司羣執事如兄弟服東面北上

有司羣執事者公臣私臣之共筮事者也此時未有
賓故有司羣執事皆如賓位西方東面北上

席于門中闌西闕外筮人取筮于西塾執之東面受命
于主人

云取筮于西塾見其所饌者與士冠禮同也亦抽上
韝魚執之筮人說見首篇

宰自主人之左贊命命曰孝孫某筮來日某諏此某事

適其皇祖某子尚饗

左當
作右

儀禮他篇凡於贊命者皆言自右與少儀所謂詔辭
自右者合惟此經言自左似無他義蓋字誤耳左當
作右來曰某亦謂丁若已也某事即歲事也此適其
皇祖某子謂主人適其廟而祭之也某子者祖諡也
稱其諡則是指大夫之為祖者言也亦假設之辭耳
士祭大夫之為祖者其禮如此所以明其從生者之
爵也尚饗謂其曰若吉則庶幾其神饗之也下筮尸

放此不言以某妃配變於大夫之筮辭也若其祝辭則亦當言之

筮者許諾還即席西面坐卦者在左卒筮寫卦筮者執

以示主人

還音旋
下並同

還亦右還也寫卦卦者也

主人受視反之筮者還東面長占卒告于主人占曰吉

長知丈反下除

長角餘並同

長占長者以次占之此與旅占互見也

若不吉則筮遠日如初儀

張子曰祭之筮日若再不吉則止據儀禮唯有筮遠日之文不云三筮筮日之禮止是二筮先筮近日後筮遠日不從則直用下旬遠日蓋亦足以致聽於鬼神之意而祀則不可廢

繼公謂即於其日改筮之亦見其異於大夫也遠日見首篇

宗人告事畢

亦徹筮席乃告

右筮日

前期三日之朝筮尸如求日之儀命筮曰孝孫某諏此
某事適其皇祖某子筮某之某為尸尚饗

注曰某之某者字尸父而名尸也字尸父尊鬼神也
大夫士以孫之倫為尸疏曰曲禮云為人子者祭祀
不為尸然則尸卜筮無父者祭祖則用孫列皆取於
同姓之適孫也

繼公謂如求日之儀，兼若不吉而改筮者言也。命筮之辭異，故特見之，明其餘皆同也。某之某，謂某之子某也。春秋傳曰：潘尫之黨，申鮮虞之摯，皆謂其子也。前期三日說見士冠禮。案注云：大夫士以孫之倫為尸，不及天子諸侯者，天子諸侯所祭者遠為尸者，不必皆其孫之倫，或但以昭穆耳。

右筮尸

乃宿尸

亦目下事也

主人立于尸外門外子姓兄弟立于主人之後北面東上
注曰不東面者來不為賓客子姓立于主人之後上
當其後

繼公謂上言筮尸如求日之儀則是筮時兄弟咸在
所筮者亦存焉筮之而吉不即告之乃於其既歸也
然後親宿之於其門者尊之而不敢苟也北面者亦
尊尸若不敢必其西面見已然

尸如主人服出門左西面

出門左西面見賓客之正位也主人北面尸不南面見之者辟尊者之禮也

主人辟皆東面北上

辟音避

注曰順尸

繼公謂辟者起敬也蓋在尸出門時皆皆子姓兄弟也是時子姓兄弟亦立于主人之後而上當其後也主人再拜尸答拜

答拜亦再拜尸不先拜者以將為尸故變於賓主禮
宗人擯辭如初卒曰筮子為某尸占曰吉敢宿

注曰宗人擯者釋主人之辭如初者如宰賛命筮尸
之辭卒曰者著其辭所易也

祝許諾致命

注曰受宗人辭許之傳命始宗人祝北面至於傳命
皆西面受命東面釋之

繼公謂祝事尸者也故於此即使之致命以見其意

云

尸許諾主人再拜稽首

注曰其許亦宗人受於祝而告主人

繼公謂拜稽首亦尊尸也尸既許諾則成為尸故於此不答拜

尸入主人退

尸既許諾則有祖道故不俟主人之退而先入見其尊亦變於大夫尸也先入而不揖辟君禮也聘禮公

與羣臣夕幣乃揖而先入少牢云主人退尸送揖不拜

右宿尸

宿賓賓如主人服出門左西面再拜主人東面答再拜
宗人擯曰某薦歲事吾子將涖之敢宿

注曰歲事歲時之祭事

繼公謂此云吾子將涖之是擯者賓既許之矣然則
筮日之後亦當有戒賓之儀如士冠禮所記者經不

見之文略耳筮尸宿尸宿賓皆同日為之故下文別云厥明以別之

賓曰某敢不敬從主人再拜賓答拜主人退賓拜送主人宿辭擯者釋之是賓之對辭亦擯者傳之矣然則凡主人親戒宿其儀皆然經不盡見之也

右宿賓

厥明夕陳鼎于門外北面上有竈

門外不言東方可知也北面北上亦放祭時陳鼎之

位也鼎而鼐亦為不宜塵

於在其南南順實獸于其上東首

獸腊也獸言東首而不及足者以其足左右出故也

士腊用兔

牲在其西北首東足

注曰其西於西也東足尚右也牲不用於以其生䟽
曰豕縛其足陳之東足寢其左

繼公謂此士之吉祭牲宜東上今腊在於而豕反居

西又異其所鄉是無所上也以其未即殺故生死不可以相統與

設洗于阼階東南壺禁在東序豆籩鉶在東房南上几

席兩敦在西堂

敦音對
下並同

豆籩鉶蓋在東房之東墉下南上者豆二以並在南
二籩次之此未實之故南上之文惟主於器士家亦
有左右房於此見之矣

主人及子姓兄弟即位于門東如初

注曰初筮位也

賓及衆賓即位于門西東面北上

此時方修祭事助祭之賓宜來視之以其不在鼎者
有司羣執事之中故此雖東面北上而不蒙如初之
文賓既位於此則公臣私臣不敢與之齒而位於他
所矣下文云宗人祝立于賓西北東面南上又記曰
公有司門西北面東上私臣門東北面西上足以明
祭時有司之屬不在賓位也審矣

宗人祝立于賓西北東面南上

祭事將至宗祝之位宜異於有司故外位在此南上
宜變於賓

主人再拜賓答再拜三拜衆賓衆賓答再拜

衆賓答一拜言再者字誤也

主人揖入兄弟從賓及衆賓從即位于堂下如外位
如外位則子姓宗人祝皆在其中矣不言者省文也
子姓之入亦先於兄弟宗祝之入宜後於衆賓

宗人升自西階視壺濯及豆籩反降東北面告濯具
宗人亦既立於賓西北之位乃升於壺言濯以見其
餘不言敦鉶几席省文也東北面鄉主人濯具謂所
濯者已具也此亦有不必濯者乃云濯具者總言之
耳

賓出主人出皆復外位

惟言賓主人出文又省矣

宗人視牲告充雍正作豕

注曰充猶肥也北面以策動作豕視聲氣

繼公謂雍正亦公有司給事者也云雍正者以事名之

宗人舉獸尾告備舉鼎鼐告潔

備具也此所告之儀亦皆東北面

請期曰羹飪

注曰期祭早晏之期也

繼公謂言以羹飪為節則質明可知請期而主人自

告之亦異於大夫請期蓋東面既得期西北面告賓
東北面告兄弟

告事畢賓出主人拜送

送于外門外

右視濯視牲為期

夙興主人服如初立于門外東方南面視側殺

注曰側殺殺一牲

繼公謂服如初冠端玄也東方蓋當東塾少南鼎之

西也

主婦視饔饔于西堂下

注曰饔宗婦為之饔近西壁南齊于坵古文饔作𩇛
周禮作饔

繼公謂視之當東面饔亦東面

亨于門外東方西面北上

亨音烹

此亦以亨者見饔之面位也東方於陳鼎之虞則又
東矣北上豕饔在北魚腊亞之

羹飪實鼎陳于門外如初

初視濯時也士昏禮既實鼎陳于門外東方北面北上謂此時也是言如初則上文所謂門外亦其東方明矣

尊于戶東玄酒在西

注曰戶室戶

實豆籩鉶陳于房中如初

注曰如初者取而實之既則反之

繼公謂如初亦如其南上之位也記曰賓與長兄弟之薦自東房其餘在東堂然則祝主人主婦賓長長兄弟之豆籩亦皆二以並相繼公而陳之於鉶之北矣

執事之俎陳于階間二列北上

注曰二列者因其位在東西不升鼎者異於神

繼公謂執事謂凡執祭事者也主人及祝以下之通稱其俎二列北上東列則胾俎為上西列則祝俎為

上其內兄弟之俎則當次於兄弟也此執事之文所
包者廣與前後所云者不同

盛兩敦陳于西堂藉用萑兒席陳于西堂如初

注曰盛黍稷者宗婦也

盛音成下同藉
在夜反萑音桓

繼公謂盛乃藉之重黍稷也此云如初則上經在西
堂之下其有脫文與

尸盥匱水實于槃中簞巾在門內之右

亦匱在槃中南流簞巾在其右盥以槃匱說見公食

大夫禮

祝筵几于室中東面

几亦右之

右亨饌陳設

主婦纓笄宵衣立于房中南面

大夫妻祭服祿衣侈袂則此宵衣乃次於祿衣者耳
纓笄士妻首飾之常言之者見其無異飾也凡婦人
助祭者與主婦同服

主人及賓兄弟羣執事即位于門外如初

此於賓兄弟之下言羣執事則是指公有司私臣而言也宗人祝亦在賓西北其他則在門西若門東與其內位同上經不見門東門西之位而亦云如初者其文主於兄弟以上而略於羣執事也

宗人告有司具

告主人也告之亦宜東北面既告則反于賓西北

主人拜賓如初揖入即位如初

初視濯時也

佐食北面立于中庭

佐食主人兄弟之佐尸食者記曰佐食於旅齒於兄弟是也。擯於門外猶在兄弟之位至此乃立于中庭。以事將至宜異其位也。此中庭謂東西之中其南北則參分庭一在北與

右即位

主人及祝升祝先入主人從西面于戶內

注曰祝先入接神宜在前也少牢饋食禮曰祝盥于洗升自西階主人盥升自阼階祝先入南面

繼公謂云及祝則是主人先升也先升後入蓋俟於堂案注引少牢云祝先入南面蓋疑此經有闕文也恐或然

主婦盥于房中薦兩豆葵菹蜎醢醢在北

蜎音螺

注曰盥盥于內洗

宗人遣佐食及執事盥出

此執事謂左人及取俎俎者賤於右人故先出不遣
賓長者賓長與主人皆在右宜同出也

主人降及賓盥出主人在右及佐食舉牲鼎賓長在右
及執事舉魚腊鼎除鼎

主人降亦宗人詔之也賓長在右謂長賓在魚鼎之
右衆賓長在腊鼎之右也然則魚腊之左者亦衆賓
與凡吉事除鼎于外凶事除鼎于內除鼎亦右人

宗人執畢先入當阼階南面

注曰畢狀如叉雜記曰杙用桑長三尺畢用桑三尺
刊其本與末杙畢同材明矣今此杙用棘心則畢亦
用棘心少牢饋食及虞無义者乃主人不親舉耳少
牢大夫祭不親舉虞喪祭也主人未執事祔練祥執
事用桑义

繼公謂宗人執畢所以指教其錯鼎之處也故宜先
入當阼階南面者示其當錯於此為之節也其南北
之節亦南於洗西與鼎入設當阼階士禮也大夫則

當東序國君則在碑南此用畢者以主人親舉重其事也鼎既錯則反之於外而復位與大射儀曰小臣師設楅司馬正東面以弓為畢則畢但主於指教設器者明矣

鼎西面錯右人抽扃委于鼎北

錯七故反下同

注曰右人謂主人及二賓

繼公謂鼎錯於東方西面順主人之面位也上者亦南于洗西右人既委扃皆西面俟于鼎東

贊者錯俎加匕

注曰贊者執俎及匕從鼎入者其錯俎西縮加匕東柄既則退而左人北面也

繼公謂贊者取匕俎于東塾東執以上而錯俎於鼎西加匕於鼎上而所俎亦在豕俎之北也此贊者蓋三人其二人各合執二俎一人兼執三匕與知取匕俎于東塾東者士虞禮匕俎在西塾之西此士吉祭當反之也

乃杌

注曰右人也左人載之

繼公謂杌亦當作匕

佐食升胙俎鼐之設于阼階西

胙音祈

注曰胙俎謂心舌之俎也郊特牲曰胙之為言敬也
言主人之所以敬尸

繼公謂以少牢饋食禮例之則此亦右人先升心舌
而佐食載惟言佐食升之其文省與設之蓋亦西縮

鼎常

作冪

卒載加匕于鼎主人升入復位

賓匕者於是亦復位

俎入設于豆東魚次腊特于俎北

注曰入設俎載者

繼公謂少牢禮曰序升自西階相從入

主婦設兩敦黍稷于俎南西上及兩鉶芼設于豆南南

陳

鉶不言北上者其實同也亦先設北者宗婦不贊敦
鉶者辟內子禮也凡敦鉶皆特執於少牢禮備見之
祝洗酌奠奠于鉶南遂命佐食啓會佐食啓會郤于敦
南出立于戶西南面

注曰後酌者酒尊要成也少牢饋食禮啓會乃奠之
繼公謂酌奠酌其所奠之酒也不云酒而云奠因事
名之

主人再拜稽首祝在左

注曰祝在左當為主人釋辭於神也祝祝曰孝孫某敢用剛鬣嘉薦普淖用薦某事于皇祖某子尚饗

繼公謂主人拜為食具也於此乃云祝在左則鄉者南面信矣祝在左說見聘禮

卒祝主人再拜稽首

祝之又反

此拜為已祝也

右設饌祝神

祝迎尸于門外

注曰尸自外來代主人接之就其次而請周禮掌次
凡祭祀張尸次

繼公謂迎尸不拜者禮不主於已代主人迎之耳其
或有拜妥尸之類乃從於主人為之也門廟門

主人降立于阼階東

注曰主人不迎尸成尸尊尸所祭者之孫也祖之尸
則主人乃宗子禰之尸則主人乃父道事神之禮廟
中而已出迎則為厭

繼公謂阼階東亦直序西面主人位於此則子姓兄弟在主人之南者其亦南於洗西與 案注之厭字蓋用喪服傳文也似失其義欲改作屈

尸入門左北面盥宗人授巾

注曰侍盥者執其器就之執簞者不授巾賤也少牢饋食禮曰祝先入門右尸入門左

尸至于階祝延尸尸升入祝先主人從

注曰少牢饋食禮曰尸升自西階入祝從主人升自

阼階祝先入主人從

右尸入

尸即席坐主人拜安尸尸答拜執奠祝饗主人拜如初
注曰饗辭取於士虞記則宜云孝孫某圭為孝薦之
饗舊說云明薦之

繼公謂饗饗神也凡饗祝之辭雖或言於尸之前實
主為神也如初再拜稽首也 案注引舊說蓋據戴
禮而言也

祝命按祭尸左執觶右取菹揄于醢祭于豆間

按當讀作授揄

如悅反

按祭即授祭也按字蓋誤祝命佐食授尸祭尸於是祭薦欲及其授祭之節也

佐食取黍稷肺祭授尸尸祭之祭酒啐酒告旨主人拜尸奠觶答拜祭釂嘗之告旨主人拜尸答拜

注曰酒與釂齊敬共之惟恐不美告之美達其心明神享之

繼公謂尸告旨而主人先拜者尸尊也

祝命爾敦佐食爾黍稷于席上

他篇言爾敦者爾黍而已此併及稷未詳

設大羹濟于醢北

大音
泰

注曰士虞禮曰大羹濟自門入

繼公謂此濟為尸設乃在左者以其居神位故變於
常禮也虞禮濟在右者喪祭也凡祭而設濟尸皆不
以之

舉肺脊以授尸尸受振祭嚌之左執之乃食食舉

乃食乃以右手食食也既食食則食舉所以安之

主人羞肝俎于腊北

肝俎一而已故主人可以親設之神俎多宜使賓也
不言降與升文省少牢禮曰主人羞肝俎升自阼階

尸三飯告飽祝侑主人拜

飯音反下同

注曰三飯告飽禮一成也侑勸也或曰又勸之使又
食少牢饋食禮侑辭曰皇尸未實侑

繼公謂此祭以饋食為名故當食而尸尤尊雖主人拜亦不答也

佐食舉幹尸受振祭嚌之佐食受加于所俎舉獸幹魚一亦如之

注曰幹長脅也獸腊

繼公謂此一舉也凡於尸每食必舉牲體若骨者明主人以此供尸食也是雖連舉三俎之實然同時相接為之故但主於牲而摠為一舉耳下文放此案

注云幹長脅也今攷長脅即正脅耳尸俎有長脅短
脅凡舉脊脅必以正者故知此幹為長脅也

尸實舉于菹豆

於既三飯而奠舉士吉祭之禮然爾士虞則不食舉
卒食乃授之是其異也

佐食羞庶羞四豆設于左南上有醢

少牢饋食禮羞兩戴兩醢此亦當放之也左亦醢之
北渚之南也南上者戴醢相間兩戴各在醢之南也

四豆乃不綰者統於正豆也正豆兩而為一列故此豆雖有四亦不宜綰以異之

尸又三飯告飽祝侑之如初舉骼及獸魚如初
注曰禮再成也獸魚如初者獸骼魚一也

繼公謂此再舉也

尸又三飯告飽祝侑之如初舉肩及獸魚如初
注曰禮三成

繼公謂此三舉也獸謂獸肩

佐食盛胙俎俎釋三个

注曰佐食取牲魚腊之餘盛於胙俎

繼公謂俎釋三个不可遽空神俎也少牢饋食禮於每牲之俎惟釋脊脅皆俎實之下者也然則此牲俎之所釋者亦宜放之其正脊長脅短脅與腊俎三个蓋如牲俎也

舉肺脊加于胙俎反黍稷于其所

此蒙佐食之文皆謂佐食舉之反之也其所俎南也

肺脊在菹豆

右尸食

主人洗角升酌醕尸

注曰不用爵者下大夫也

繼公謂不言降以升見之也

尸拜受主人拜送尸祭酒啐酒賓長以肝從尸左執角
右取肝揆于鹽振祭嚙之加于菹豆

置肝于菹豆尊者之吉禮然也

卒角祝受尸角曰送爵皇尸卒爵主人拜尸答拜

注曰曰送爵者節主人拜

繼公謂云皇尸卒爵明主人當送之也後言之者見送爵之辭為指主人尸卒爵而不拜既乃俟主人先拜送者所以深見其尊尸也祝釋辭其東面於尸席前之東與

祝酌授尸尸以醋主人

醋音昨

祝不洗而酌注見前篇

主人拜受角尸拜送主人退佐食授授祭

注曰退者進受爵反位古文醋作酢

繼公謂此授字亦因與授字相類而衍也以神俎敦之黍稷肺祭授之者象尊者賜之食然

主人坐左執角受祭祭之祭酒啐酒進聽嘏

進聽嘏進於尸前而聽其嘏已之辭下文云親嘏主人是也又以少牢饋食禮之所言者參之則此嘏云者蓋致福於人之稱

佐食搏黍授祝祝授尸尸受以菹豆執以親嘏主人

注曰獨用黍者食之主

繼公謂饋食之禮主於黍稷而黍又其尊者故特取之以通其意焉然則遠辟大夫禮也少牢饋食禮所載嘏辭乃祝傳尸嘏者也此尸親嘏其辭之首與彼異

主人左執角再拜稽首受復位詩懷之實于左袂挂于

季指卒角拜尸答拜

挂音卦

注曰實于左袂便右手也

繼公謂左執角為右手將有事也詩字未詳或曰敬
慎之意內則曰詩負之亦此意也拜不奠爵受黍不
祭皆異於大夫也季指左手之小指也挂祛於指以
黍在袂中故也古者祛挾於袂然猶挂之者慮拜時
或遺落也主人拜受黍而尸不答拜者以其受神惠
故也

主人出寫魯于房祝以籩受

出亦執角以出也籩虛籩也此單言醬少牢言醬黍
皆未詳

右主人酌尸尸酢主人

筵祝南面

筵祝蓋於其立處之西亦有司為之下放此

主人酌獻祝祝拜受角主人拜送設菹醢俎

注曰菹醢皆主婦設之佐食設俎

繼公謂士虞與少牢禮皆云祝與佐食坐受爵此不

言坐如之可知道醢葵菹蜎醢也

祝左執角祭豆興取肺坐祭臠之興加于俎坐祭酒啐
酒

此離肺也當奠角乃興取肺坐絕祭臠之既執角乃
祭酒不言奠角執角與絕者亦文略耳記曰祝俎離
肺一

以肝從祝左執角右取肝換于鹽振祭臠之加于俎卒
角拜主人答拜受角

肝加于俎辟尊者禮也下文主人主婦之儀亦放此
少牢饋食禮曰不興加于俎

酌獻佐食佐食北面拜受角主人拜送佐食坐祭卒角
拜主人答拜受角降反于筐升入復位

上不言坐故於祭見之

右主人獻祝佐食

主婦洗爵于房酌亞獻尸

亞獻更用爵以見主人之用角者有為為之耳獻以

爵正禮也獻尸不夾拜辟內子之禮也

尸拜受主婦北面拜送

注曰北面拜者辟內子之禮也大夫之妻拜於主人
北西面

宗婦執兩籩戶外坐主婦受設于敦南

注曰兩籩棗栗棗在西

繼公謂宗婦贊豆籩戶外坐士祭禮然也少牢饋食
禮主婦與贊者授受於室中亦異者也士虞禮籩設

于會南此宜如之乃不云會者可知也

祝贊籩祭尸受祭之祭酒啐酒

注曰籩祭棗栗之祭也其祭之亦於豆祭

繼公謂惟云尸受則是祝皆取二籩之祭以授之也
亦左執爵乃受之

兄弟長以燔從尸受振祭嘑之反之

尸取燔於俎乃云受者羞燔者執俎以進之亦相授
之義也故於尸以受立文此亦左執爵乃受燔

羞燔者受加于斂出

尸反其燔於俎羞燔者則以俎受之也既則執之以加于斂

尸卒爵祝受爵命送如初

注曰送者送卒爵

繼公謂初亦主人儀也

酢如主人儀

注曰尸酢主婦如主人儀者自祝酌至尸拜送如酢

主人也不易爵辟內子之禮

主婦適房南面佐食授祭主婦左執爵右撫祭祭酒啐酒入卒爵如主人儀

房中南面主婦之正位也經因事見之授亦當作授祭亦謂黍稷肺祭也佐食授祭主婦撫之而不取亦異於內子也既撫則佐食以祭置于地主婦入于室中北面而立飲如主人儀謂卒爵拜尸答拜也入室卒爵亦以鄉者於此拜受故也

右主婦獻尸酢主婦

獻祝籩燔從如初儀

主婦當更酌洗于房中乃酌獻祝略如內子之禮蓋男子不承婦人爵也初儀即主人獻祝之禮此惟無祭俎一節餘則如之也籩與豆燔與肝雖異其祭之儀則同故亦蒙如初祝亦兩籩其設之棗在菹西栗在棗南

及佐食如初卒以爵入于房

注曰及佐食如初如其獻佐食則拜主人之北西面也

繼公謂及謂獻及之也初者亦主人獻佐食之儀少牢禮主婦獻祝及佐食皆西面於主人之北答拜之

右主婦獻祝佐食

賓三獻如初燔從如初爵止

注曰初亞獻也

繼公謂不言洗爵升酌可知也如初謂尸拜受主婦

拜送也尸於舉酌之末亦欲主人而下皆受舉爵之禮故止爵以見其意於是主人主婦交相致爵既而遂獻賓以至於私人而終尸意焉其爵止之節在羞燔者出之時也賓長亦出而復位

右賓長獻尸酌止

席于戶內

注曰席自房來

繼公謂設席蓋於主人所立處之南席亦南上未受

爵而設席變於大夫

主婦洗爵酌致爵于主人主人拜受爵主婦拜送爵

注曰主婦拜拜於北面也

繼公謂是亦獻也乃不云獻者酒乃已物不可以獻
為名故謂之致爵亦拜受于席

宗婦贊豆如初主婦受設兩豆兩籩

注曰初贊亞獻也

繼公謂贊豆贊豆與籩也此豆兼籩言之省文耳如

初戶外坐也主婦受於戶外而設於席前其豆則菹
在北其籩則棗在菹北栗在棗西也設豆東面設籩
南面與此宗婦贊者亦一人耳既授兩豆復取兩籩
于房

俎入設

注曰佐食設之

疏曰有司不饋尸者主婦致爵於主人時佐食設俎
繼公謂設于豆西

主人左執爵祭薦宗人替祭奠爵興取肺坐絕祭臠之
興加于俎坐拱手祭酒啐酒

此替祭薦蓋以籩祭授之祭離肺之儀鄉飲酒禮備
矣

肝從左執爵取肝換于鹽坐振祭臠之宗人受加于俎
燔亦如之

坐字衍宗人既受肝則主人復右執爵矣一進酒而
兩進從俎者欲其與尸祝之兩獻者同見其尊也主

婦禮亦如之

興席末坐卒爵拜

席末席上之北於此卒爵近於受爵之處也鄉者受爵在所設席之北不降席者亦因尸禮也

主婦答拜受爵酌醋左執爵拜主人答拜坐祭立飲卒爵拜主人答拜主婦出反于房

酢不易爵者禮婦人承男子後多不易爵則其自酢又可知矣主婦自酢者主人辟尸不敢酢主婦主婦

達其意也下自酢之義皆類此反奠爵于筐也左字
非誤則衍內則曰凡女拜尚右手

右主婦致爵于主人自酢

主人降洗酌致爵于主婦席于房中南面主婦拜受爵
主人西面答拜宗婦薦豆俎從獻皆如主人

不言升酌文省耳主人於主婦亦謂之致爵者夫妻
一體也主婦席南面變於大夫不賓尸之禮也亦拜
受于席豆亦兩豆兩簋俎牲俎也從獻肝燔也皆如主

人謂其受爵以前之禮也所異者其不用贊與此席蓋於房中之北堂

主人更爵酌醋卒爵降實爵于篚入復位

更爵更取在內篚者也男子不承婦人爵雖自醋猶更之內篚在洗東乃不因而洗之者以其自醋也自醋而不洗亦因尸之醋禮也此醋亦在房中西面其他儀皆與主婦自醋者略同以有成禮故略而不見之卒爵則坐惟此與主婦異耳位室中位凡男子易

爵于內篚惟醕于房中者得由便為之不然則否

右主人致爵于主婦自酢

三獻作止爵

注曰賓也謂三獻者以事命之作起也舊說云賓入戶北面曰皇尸請舉爵

繼公謂致爵之禮成亦足以少塞尸之止爵意矣於此而作止爵亦宜也若俟畢獻乃為之則久留尊者之爵非所以為敬

尸卒爵酢酌獻祝及佐食洗爵酌致于主人主婦燂從
皆如初更爵酢于主人卒復位

注曰洗乃致爵為異事且以承佐食賤新之

繼公謂賓獻祝亦北面拜於戶西獻佐食亦西面拜
於主人之南也賓既獻佐食則室中之事畢矣乃復
致爵者因上禮也皆皆尸卒爵以下也自尸卒爵以
至及佐食如主人酢獻之禮也致于主人者如主婦
致爵之禮也致于主婦者如主人致爵之禮也燂從

者如亞獻祝及致于主人主婦之禮也言此則是其從獻之物僅有此耳亦見其殺於初者也致于主人主婦乃惟酢于主人者為禮主於尊者也賓更爵自酢其義與主人之自酢者同更爵不言降與升酌又不言如初亦文省

右賓作止爵尸酢賓賓獻祝佐食致于主人
主婦自酢

主人降阼階西面拜賓如初洗賓辭洗

注曰拜賓為將獻之如初如視濯時

繼公謂階下當有前字初謂三拜衆賓衆賓皆答一拜也將獻而旅拜賓賓一人辭洗則是助祭之賓其尊卑但與鄉飲酒之衆賓同耳少牢下篇曰主人洗爵長賓辭主人奠爵于篚興對

卒洗揖讓升酌西階上獻賓

獻賓蓋西南面也

賓北面拜受爵主人在右答拜薦脯醢設折俎

自賓以下其設薦俎者皆以私人為之與

賓左執爵祭豆奠爵興取肺坐絕祭臠之興加于俎坐
扱手祭酒卒爵拜主人答拜受爵酌酢奠爵拜賓答拜
豆亦兼遵言也賓云卒爵拜主人云奠爵拜文互見
耳

主人坐祭卒爵拜賓答拜揖執祭以降西面奠于其位
位如初薦俎從設

注曰位如初復其位東面

繼公謂執祭脯也云位如初嫌既獻則位或異也

右主人獻賓長自酢

衆賓升拜受爵坐祭立飲薦俎設于其位辯主人備答

拜焉降實爵于篚

辯音偏
下並同

注曰鄉飲酒記曰立卒爵者不拜既爵備猶盡也

繼公謂立飲亦為不拜既爵也其說見鄉飲酒與其
記辯謂皆有薦俎也其薦俎亦於每獻一人則設之
備答拜謂悉答之也其拜亦在每人受爵之後

右主人獻衆賓

尊兩壺于阼階東加勺南枋西方亦如之

為賓及兄弟設之也西方之尊其在西階西與設尊於堂下者欲其便且別於大夫禮也兩壺皆酒者別於上尊也

主人洗觶酌于西方之尊西階前北面酬賓賓在左

於此酬賓終正禮也酬賓於西方故酌西方之尊必酬之者重其為賓也酬於下者宜近賓位便其奠之

主人奠饌拜賓答拜主人坐祭卒饌拜賓答拜

此賓主之拜亦皆北面

主人洗饌賓辭主人對

少牢下篇云主人奠爵于篚對

卒洗酌西面賓北面拜

注曰西面者鄉賓位立於西階之前賓所答拜之東
北

主人奠饌于薦北

不授而奠酬之正禮薦北薦左也既奠則復位北面拜文不具耳此奠饌于庭皆將舉者也而或在薦左或在薦右蓋各從其便而不取奠者於左將舉於右之義也

賓坐取饌還東面拜主人答拜賓奠饌于薦南揖復位注曰還東面就其位薦西

繼公謂賓坐取饌而興象受之也賓取饌亦西面還而東面拜謝主人之奠饌也執奠饌而拜所以見其

意東面而奠于薦南亦便也復位主人復阼階下西面位也奠而不辭既則以拜謝之皆變於飲酒之儀也

右主人酬賓長

主人洗爵獻長兄弟于阼階上如賓儀

注曰酬賓乃獻長兄弟者獻之禮成於酬先成賓禮也

繼公謂此獻于阼階上異内外也獻亦西南面賓賓

長也如賓儀兼酢言也

右主人獻長兄弟自酢

洗獻衆兄弟如衆賓儀

獻衆兄弟與獻長兄弟之禮相屬乃為之洗者以其承已自酢之後故須洗之也然則獻衆賓於自酢之後則亦宜為之洗矣上經不言者文略耳

右主人獻衆兄弟

洗獻內兄弟于房中如獻衆兄弟之儀

注曰內兄弟內賓宗婦也如衆兄弟如其拜受坐祭
立飲設薦俎於其位而辯內賓其位在房中之尊北
有司徹曰主人洗爵內賓於房中南面拜受爵
繼公謂獻之蓋西北面

主人西面答拜更爵酢卒爵降實爵于篚入復位
注曰內賓之長亦南面答拜

繼公謂更爵亦在房中者也獻畢乃酢其長亦猶賓
致爵于主人主婦而受爵酢于主人之義也不言酢

儀者其禮可得而推故爾

右主人獻內兄弟自酢

長兄弟洗觚為加爵如初儀不及佐食洗致如初無從
注曰大夫士三獻而禮成多之為加也不及佐食無
從殺也致致於主人主婦

繼公謂無從謂所獻所致者皆無燔從也無從則不
啐酒而卒爵亦其異者

右長兄弟為加爵

衆賓長為加爵如初爵止

鄉者三獻用爵其爵止而主人主婦之致亦用爵蓋
放尸器而用之也此爵止之後室中及庭中行禮者
皆用觶以是推之則此加爵當用觶經不見之文略
耳如初亦如亞獻也此亦無從尸祭酒啐酒而爵止
矣尸於舉觶之節又欲觶之徧行也故止之以見其
意蓋與三獻而止爵者相類也

右衆賓長為加爵

嗣舉奠

注曰嗣主人將為後者大夫之嗣子不舉奠辟諸侯
繼公謂舉奠謂舉奠解而飲之重適故特為此禮是
惟主於有適者言之無適則已

盥入北面再拜稽首

盥盥于洗也再拜稽首重尊者之賜也北面亦於戶
西

尸執奠進受復位祭酒啐酒尸舉肝舉奠左執觶再拜

稽首進受肝復位坐食肝卒觶拜尸備答拜焉

注曰備答拜每拜答之

繼公謂奠鉶南之觶也肝即臠之加于菹豆者也位室中之位也坐卒觶亦異其室中之禮凡子姓受主人之獻亦立卒爵不拜既爵

舉奠洗酌入尸拜受舉奠答拜尸祭酒啐酒奠之舉奠出復位

注曰奠之者復神之奠觶

繼公謂舉奠酌以進尸反尸之奠禪耳尸祭啐奠之
如初禮新之

右嗣舉奠

兄弟弟子洗酌于東方之尊阼階前北面舉禪于長兄
弟如主人酬賓儀

注曰弟子後生也

繼公謂如主人酬賓儀者是亦在長兄弟之右也此
有代主人酬長兄弟之意故位與主人同主人酬賓

奠饌于薦北此則當奠于薦南而長兄弟則取饌還西面奠于薦北也

右兄弟之弟子舉饌于其長

宗人告祭胥

注曰胥俎也所告者衆賓衆兄弟內賓也獻時設薦俎于其位至此告之祭使成禮也其祭皆離肺不言祭豆可知

繼公謂所告者衆賓衆兄弟內兄弟也公有司私臣

亦存焉將羞乃告祭胥蓋與燕禮大夫祭薦之意同也記言衆賓以至私臣皆肴胥膚一離肺一又曰公有司獻次衆賓私臣獻次兄弟

乃羞

羞庶羞也此但以羞為文則是自尸而下以至於私臣皆然也大夫祭禮羞于尸祝主人主婦與羞于賓兄弟內賓及私臣不同時又加以內羞此則一之亦士禮異也

右祭胥乃羞

賓坐取觶阼階前北面酬長兄弟長兄弟在右

注曰薦南奠觶

繼公謂長兄弟在右賓在左各象其位也

賓奠觶拜長兄弟答拜賓立卒觶酌于其尊東面立長兄弟拜受觶賓北面答拜揖復位

注曰其尊長兄弟尊也此受酬者拜亦北面

繼公謂阼階東之尊為長兄弟而下設之故曰其尊

若彼自有之然西方之尊亦如之東面立變於鄉飲
酒酬者之儀也鄉飲酒禮賓東南面酬主人主人西
南面酬介此東面酬長兄弟亦惟北面受之下放此
長兄弟西階前北面衆賓長自左受旅如初

注曰初賓酬長兄弟

繼公謂初謂奠觶拜受旅者答拜也

長兄弟卒觶酌于其尊西面立受旅者拜受長兄弟北
面答拜揖復位衆賓及衆兄弟交錯以辯皆如初儀

錯如
字

交錯謂二黨互相酬也初儀即上文所言相酬之禮

右賓與兄弟旅酬

為加爵者作止爵如長兄弟之儀

奠觶既舉其禮一終於此可以作止爵矣不俟再旅者其意與三獻作止爵於獻賓之前者同

右眾賓長作止爵

長兄弟酬賓如賓酬兄弟之儀以辯卒受者實觶于篚

如謂儀略同耳其異者則以意定之

右兄弟與賓旅酬

賓弟子及兄弟弟子洗各酌于其尊中庭北面西上舉
觶於其長奠觶拜長皆答拜舉觶者祭卒觶拜長皆答
拜

此中庭東西之中也其南北之節則皆少南於其長
之前與西上者尊賓之弟子也是時長皆在東西面
之位而拜之卒觶坐卒觶也此觶乃代主人舉之故

其儀與鄉飲舉觶者略同

舉觶者洗各酌于其尊復初位長皆拜舉觶者皆奠觶于薦右

薦右賓之薦南兄弟之薦北也奠於此者因其所改奠之處也緣長者意不欲勞其復遷之此觶為無筭爵始

長皆執以興舉觶者皆復位答拜長皆奠觶于其所皆揖其弟子弟子皆復其位

注曰復其位者東西面位弟子舉觶於其長所以序長幼教孝弟拜亦皆北面

繼公謂執以興亦象受之其所薦右也揖揖之使復其位

爵皆無筭

此亦賓先舉奠觶酬兄弟長交錯以辯卒飲者洗酌反奠於故處長兄弟又舉奠觶酬賓長亦交錯以辯卒飲者洗酌亦反奠於故處賓及兄弟又迭舉奠觶

皆如初禮終而復始故云爵皆無筭若其儀之與旅
酬異者惟不拜耳

右賓弟子兄弟弟子各舉觶于其長遂無筭

爵

利洗散獻于尸酢及祝如初儀降實散于篚

散息但反下
及記並同

注曰利佐食也更言獻者以利待尸禮將終宜一進
酒嫌於加酒亦當三也不致爵禮又殺也

繼公謂佐食云利未詳或曰以其善佐尸食而宜於

尸故曰利利之言宜也未知是否

右佐食獻尸祝

主人出立于戶外西面

戶外戶東少南也不立于阼亦變於大夫

祝東面告利成

東面于戶外之西

尸謏祝前主人降

注曰少牢饋食禮曰祝入尸謏主人降立于阼階東

西面祝先尸從遂出于廟門其儀士虞禮備矣

祝反及主人入復位命佐食徹尸俎俎出于廟門

注曰少牢饋食禮曰有司受歸之

繼公謂言及見其先入也

闕

尸

俎胙俎也

徹庶羞設于西序下

徹者亦佐食也徹庶羞亦改設者尊尸食故未即去之西序下其東也此先徹庶羞亦與大夫禮相變

右尸出

筵對席佐食分簋鉶

筵對席設對席于饌東也此於神席亦為少北其名義與昏禮之對席同下篇放此簋即敦之異名分簋鉶者以簋分簋實以鉶分鉶羹也為將餽分之或曰以尸之兩敦兩鉶分與二養也其敦則上養黍而下養稷亦異於大夫之養者惟用黍也未知孰是

宗人遣舉奠及長兄弟盥立于西階下東面北上

舉奠子姓也云及長兄弟則主人之子位在長兄弟之上明矣立于西階下俟命也其位蓋在賓之東北祝命嘗食養者舉奠許諾升入東面長兄弟對之皆坐

佐食授舉各一膚

養音俊

命告也嘗食二字或當在養者之下舉奠東面升尸席也長兄弟對之升對席也使嗣子餽故不敢以賓長對之而使長兄弟也以膚為舉亦欲其每食則啗之士以二人養降於大夫者兩也其養惟以嗣子及

長兄弟又與大夫禮相變云古文養皆作餼

主人西面再拜祝曰養有以也兩養奠舉于俎許諾皆答拜

西面蓋于其位養有以也其意未詳或曰言主人所以使女養者蓋有相親敬之意不欲明說故惟言有以也下文有與之言亦類此俎者上養豕而下養腊與

若是者三

所以見主人殷勤之意也三者摠言之蓋禮成於三也然則主人拜祝釋辭饗答拜者又二也

皆取舉祭食祭舉乃食祭鉶食舉

祭舉亦振祭瘠之食食乃祭鉶變於尸

卒食主人降洗爵宰贊一爵主人升酌酳上饗上饗拜受爵主人答拜酳下饗亦如之

注曰少牢饋食禮曰贊者洗三爵酌主人受于戶內以授次饗

繼公謂醕下養亦東面于其席前之北授之

主人拜祝曰醕有與也如初儀

有與猶有以也初儀主人再拜及兩養許諾也

兩養執爵拜

注曰答主人也

繼公謂此著其拜之異於上者也凡男子執爵拜皆左執之內則曰凡男拜尚左手

祭酒卒爵拜主人答拜兩養皆降實爵于篚

注曰下養復兄弟位

繼公謂上養將酢乃亦實爵于篚者宜與下養共終其事不可由便也

上養洗爵升酌酢主人

酢主人東面鄉之於其位上養得親酢者尸已出故也此亦變於大夫之禮大夫養者不親酢

主人拜受爵

主人亦西面拜也主人父也上養子也父乃先拜其

子而不以為嫌者以事養之禮當然故略於父子之分也此與事尸之意微相類

上養即位坐答拜主人坐祭卒爵拜上養答拜受爵降實于筐主人出立于戶外西面

戶外亦戶東

右養

祝命徹胾俎豆籩設于東序下

注曰命命佐食胾俎主人之俎

繼公謂改設之尊之也主人之俎謂之阼俎者以其
設於主位而名之也戶內之東祭時室中之主位也
東序下堂上之主位也凡祭奠之禮其徹尊者之盛
饌必改設之乃去之宗婦不徹之者以其改設于東
序非婦人之事也其設之面位亦如在室既饗乃徹
阼薦俎亦變於大夫禮

祝執其俎以出東面于戶西

注曰俟告利成

繼公謂不俟改設尸俎而先出者亦異於大夫此云
戶西則主人立于戶東明矣

宗婦徹祝豆籩入于房徹主婦薦俎

此所徹者皆置于房故宗婦得為之不言席文省

佐食徹尸薦俎敦設于西北隅儿在南扉用筵納一尊

佐食闔牖戶降

匪符
味反

既餽復改設而未即徹去者重其為神之餘食也一
尊酒尊也納于室中之北墉下必納之者以酌神之

酒於是乎取之故亦改設而未即徹於徹室中之饌
乃并去之不納玄尊者以其初不用於神也佐食闔
牖戶因後出而為之

右徹改設

祝告利成降出主人降即位宗人告事畢賓出主人送
于門外再拜

門外廟門外也賓既出則婦人亦徹室中之饌與
佐食徹阼俎堂下俎畢出

注曰記俎出節

繼公謂昨俎執事者俎之最尊者故其出也以為節賓長以下各自執之出以授人既則復反其位

右禮畢

記特牲饋食其服皆朝服玄冠緇帶緇鞶

食音嗣
朝音潮

皆者皆賓與兄弟及公有司私臣也此指祭時之服也經云夙興主人服如初則固冠端玄矣助祭必朝服而不玄端服者與人之祭宜盛服也緇鞶者其別

於大夫助祭之賓與朝服用玄端之衣冠皮弁之裳
故次於皮弁而尊於玄端

唯尸祝佐食玄端玄裳黃裳雜裳可也皆爵韞

注曰與主人同服

繼公謂士尸服玄端亦以其為卒者之正服也然則
尸服卒者之上服唯喪祭耳祝佐食與主人亦玄端
者以其事尸於室尤為近之故服宜與尸同言玄端
玄裳又言黃裳雜裳可也者蓋以賤者或不能備服

故制此禮以通之其朝服之裳惟許用素積者豈以素者易辦故與

設洗南北以堂深東西當東滌水在洗東篚在洗西南

順實二爵二觚四觶一角一散

深式
鳩反

注曰舊說云爵一升觚二升觶三升角四升散五升
李寶之曰賓獻尸之時爵止主人當致爵于主婦故
爵云

繼公謂二觚者長兄弟以觚為加爵因以致于主人

主婦既則更之以酢于主人也四禪者其一奠于神
席前其一乃主人以奠酬於賓其一乃衆賓長為加
爵於尸其一乃爵止而未舉之時兄弟弟子舉禪於
其長者也

壺檮禁饌于東序南順覆兩壺焉蓋在南明日卒奠罷
用綌即位而徹之加勺

覆芳
服反

注曰覆壺者盞瀝水且為其不宜塵

楊志仁曰奠酌奠奠于鉶南時即位尸即席坐時

繼公謂壺檠禁廢壺之檠禁也禁名曰檠其制則未聞鼎亦當作冪既奠乃冪之則未酌以前用蓋與籩巾以綌也纁裏棗烝栗擇

注曰舊說云纁裏者皆玄被

繼公謂籩用巾謂既實而陳之之時也及將設則去之獨籩用巾者以其未即設故為禦塵此巾云纁裏則是凡巾皆複為之矣

銅匏用苦若薇皆有滑夏葵冬苴

此無羊鉶故豕鉶亦得用苦然則鉶茅之異者非為各有所宜也士虞禮記云有杞

棘心匕刻

注曰刻若今龍頭

繼公謂喪祭匕用桑吉祭匕用棘者喪桑音同吉棘聲近故也

牲爨在廟門外東南魚腊爨在其南皆西面

士喪禮曰為塋於西牆下又吉凶之饔爨皆近於壁

以是例之則凡門外之爨亦當在牆下明矣

饔爨在西壁

士之饔爨在內者以宗婦主其事也大夫則以廩人為之故其爨亦在門外

所俎心舌皆去本末午割之實于牲鼎載心立舌縮俎

去起
呂反

注曰午割從橫割之亦勿沒

繼公謂既實牲體於鼎乃制此而實之於其上載謂

載於所俎心舌皆當牲體之中為內體之貴者故不
他用而專以進於尸又見少牢饋食禮

賓與長兄弟之薦自東房其餘在東堂

經惟云豆籩鉶在東房蓋主於尸者也此又見賓與
長兄弟之薦則祝主人主婦之薦亦在東房矣賓賓
長也其餘次賓次兄弟而下與內兄弟及公有司私
臣也公有司私臣有俎則有薦可知經記不見之耳
少牢饋食禮私人有薦胾

沃尸盥者一人奉槃者東面執匱者西面淳沃執中者

在匱北

奉芳勇反
淳之純反

注曰匱北執匱者之北亦西面

繼公謂者一人三字疑衍又淳沃並言之亦未詳

宗人東面取巾振之三南面授尸卒執巾者受

振之三為去塵敬也宗人授巾尊尸也卒謂已挽手
受巾亦以簞少牢饋食禮曰卒盥坐奠簞取巾興振
之三以授尸坐取簞興以受尸巾

戶人主人及賓皆辟位出亦如之

辟音避

入入門也出出戶也言主人及賓則兄弟之屬在其
中矣

嗣舉奠佐食設豆鹽

置鹽於豆而設於舉奠之前為其食肝也

佐食當事則戶外南面無事則中庭北面

注曰當事將有事而未至

凡祝呼佐食許諾

注曰呼猶命也

宗人獻與旅齒于衆賓

注曰齒從其長幼之次

繼公謂記末云公有司獻次衆賓宗人亦公有司也
乃齒於衆賓者所謂有上事者貴之也

佐食于旅齒于兄弟

佐食已獻於室中故獻兄弟時不與而但與其旅酬
也云齒於兄弟則士之佐食亦其兄弟明矣

尊兩壺于房中西墉下南上

注曰為婦人旅也其尊之節亞西方

繼公謂兩壺皆酒云南上者亦以其先酌在南者與
內賓立于其北東面南上宗婦北堂東面北上

注曰二者所謂內兄弟內賓姑姊妹也宗婦族人之
婦其夫屬于所祭為子孫或南上或北上宗婦宜統
於主婦主婦南面

繼公謂云內賓立于尊北記者蓋取尊為節而見其

位之所在耳其實內賓之位已定於未設尊之時也
主婦及內賓宗婦亦旅西面

注曰西面者異於獻也男子獻於堂上旅於堂下婦
人獻於南面旅於西面內賓象衆賓宗婦象兄弟其
節與其儀依男子也其拜及飲者皆西面于主婦之
東南

繼公謂此旅酬之儀雖與在庭者略同然亦不能無
少異蓋主人既酢內兄弟主婦則酬內賓之長酌奠

于薦左內賓之長坐取之奠于右及兄弟舉旅之時
內賓之長亦取奠觶以酬主婦主婦以酬次內賓次
內賓以酬宗婦之長亦交錯以辯內賓之少者宗婦
之少者又各舉觶于其長以為無筭爵始內賓長之
觶惟以旅主婦而已宗婦長之觶則以旅次內賓亦
交錯以辯皆不拜略如鄉射無筭爵之儀也然則房
中之篚其實一爵二觶與

宗婦贊薦者執以坐于戶外授主婦

此儀已見於經而記復著之蓋備載其所聞耳

尸卒食而祭饔饔雍饔

注曰雍孰肉以尸享祭竈有功也舊說云宗婦祭饔饔亨者祭雍饔用黍肉而已無籩豆俎禮器曰夫饔者老婦之祭盛於盆尊於瓶

繼公謂此以尸享祭而祭竈亦見其尊尸之意牲魚腊之饔皆謂之雍饔少牢禮曰雍饔在門東南北上賓從尸俎出廟門乃反位

注曰賓從尸送尸也士之助祭終其事也俎尸俎也
賓既從尸復入反位者宜與主人為禮乃去

尸俎右肩臂臠肫胙正脊二骨橫脊長脅二骨短脅

注曰尸俎神俎也

繼公謂長脅即正脅也士之祭其俎豆之屬既貶於
大夫者二而其俎實之脊脅之骨又各貶其半皆降
殺以兩之意也

膚三

特牲無膚俎故以膚附于牲俎焉三者亦貶於大夫之尸也凡膚與牲體同在尸俎者大夫五士三少牢下篇言尸之豕膏膚五是也大夫以上膚若別俎則若七若九以差而加之

離肺一

注曰舉肺也

判肺三

判七本反

注曰為尸主人主婦祭今文判為切

繼公謂祭肺言剝或言切皆見其制也

魚十有五

注曰少牢饋食禮亦云十有五而俎尊卑同此所謂經而等也

繼公謂此盛祭禮也

腊如牲骨

惟云骨而不言體者蓋骨可以該體而體不可以該骨也言骨則體在其中矣

祝俎髀脰脊二骨脅二骨膚一離肺一

髀謂右髀亦用尸俎之不升者也脅代脅也不見之者上言脰脊則此為代脅可知矣祝脊脅用二骨見其尊於執事者也此離肺膾肺也祝祭以離肺其義與虞禮同餘放此

阼俎臂正脊二骨橫脊長脅二骨短脅膚一離肺一臂左臂阼俎尊乃不用左肩而用左臂者屈於尸也脊脅非體也故得與尸同以伸其尊亦以特牲之俎

實少故爾少牢俎實多故主人主婦脊脅皆減於尸

主婦俎𦣻折其餘如𦣻俎

𦣻尸角反
又苦角反

注曰𦣻後足餘謂脊脅膚肺

繼公謂𦣻非正體折骼之下而取之故云𦣻折凡牲
固皆折也然經文之例其先言體乃言折或單言折
者必非正體若全體者也蓋與折俎之說不同主婦
俎之脊脅其名數必不盡與𦣻俎同乃云如𦣻俎者
亦大略之言也少牢饋食禮𦣻俎脊脅皆牢主婦俎

之脊脅但用羊也則此可知矣

佐食俎𦍋折脊脅膚一離肺一

主婦俎與佐食俎同用𦍋而主婦尊於佐食則主婦
右佐食左與或曰佐食宜用右𦍋猶祝俎用右髀之
意未知孰是

賓骼長兄弟及宗人折其餘如佐食俎

骼左骼也凡骼與𦍋連乃為全體上記兩見𦍋折則
此骼亦非全體矣不言骼折者以其可知不必言也

長兄弟及宗人折亦謂折分其全體也不言其體者
或以其所用者不定故與其餘謂脊脅膚肺

衆賓及衆兄弟內賓宗婦若有公有司私臣皆殺脅膚
一離肺一

公有司公家所使給私家之事者也私臣私家之臣
或已所自有或假於他家皆是也云若有者不定之
辭祝宗人亦公有司也已見其俎於上若有之文主
於殺脅者耳此俎無脊脅者以其或用脊若脅為殺

胥故也

公有司門西北面東上獻次衆賓私臣門東北面西上
獻次兄弟升受降飲

注曰亦皆與旅

繼公謂門西者尚右門東者尚左亦各變於東面西
面之位者也獻公有司於西階上私臣於阼階上其
受爵則惟二者之長拜於下乃升受主人答拜乃降
飲餘皆不拜

儀禮集說卷十五

欽定四庫全書

經部

儀禮集說卷十六

詳校官監察御史_臣李陽樸

侍讀_臣孫球覆勘

總校官檢討_臣何思鈞

校對官中書_臣嵇承志

謄錄監生_臣汪師曾

欽定四庫全書

儀禮集說卷十六

元 敖繼公 撰

少牢饋食禮第十六

注曰於五禮屬吉禮

繼公謂此篇言大夫祭其祖之禮

少牢饋食之禮

少詩照反
食音嗣

注曰禮將祭祀必先擇牲繫于牢而芻之羊豕曰少

牢

日用丁巳

巳音紀

注曰內事用柔日必丁巳者取其令名自丁寧自改變皆為謹敬

繼公謂此指筮日之日也所謂諏日者也先諏是日至其日乃筮

筮旬有一日

以丁若巳之日而筮旬有一日則所筮之日亦丁若巳可知矣以丁巳之日而筮丁巳乃云旬有一日則

是并筮日之日而數之也古者數日之法於此可見
筮於廟門之外主人朝服西面于門東史朝服左執筮
右抽上韝兼與筮執之東面受命于主人

朝並直遙反
下朝服並同

朝服大夫士以筮之正服也史亦公有司也周官筮
人職中士二人史二人士冠特牲之筮者言筮人此
言史蓋互文也大夫筮亦朝服者降於卜也雜記言
大夫卜宅與葬日云占者皮弁又云如筮則占者朝
服是其服異也

主人曰孝孫某來曰丁亥用薦歲事于皇祖伯某以某
妃配某氏尚饗

注曰丁未必亥也直舉一日以言之耳禘於太廟禮
曰日用丁亥伯某且字也其仲叔季亦曰仲某叔某
季某某妃某妻也合食曰配某氏若言姜氏子氏也
繼公謂此惟云丁亥特見其一耳必言丁亥者以其
為六丁之末者故設言之也末者且用則其上者可
知矣已日亦宜如之稱其祖字則是指士之為祖者

而言亦假設之辭耳大夫祭士之為祖者如此亦所以明其從生者之爵也其祖禰若為大夫則稱曰某子聘禮記曰皇考某子是也大夫三廟其常祀自曾祖而下此辭惟言皇祖者亦見其一耳三廟說見聘禮

史曰諾西面于門西抽下轅左執筮右兼執轅以擊筮擊筮者為將述命故也不述命則無此儀

遂述命曰假爾大筮有常孝孫某來日丁亥用薦歲事

于皇祖伯某以某妃配某氏尚饗

大音泰

注曰重以主人辭告筮也假借也

繼公謂大者尊之之辭假爾大筮謂假借爾大筮之靈以問於神也有常謂其常常如此也言每有疑事則必問之而不敢專決所以見其敬信之意孝孫某以下之辭則所謂述命也

乃釋纁立筮

立筮而又在門西皆大夫之禮異者也

卦者在左坐卦以木卒筮乃書卦于木示主人乃退占
注曰卦者史之屬也卦以木者每一爻畫地以識之
六爻備書於板史受以示主人退占東面旅占之
繼公謂此卦者坐亦與筮者相變也上木畫地者也
下木板也退退于其位也不言其位亦西方東面可
知此占者亦當三人也大夫廟門外之位具有司之
西方東面者惟此耳蓋筮者有事於神故不為大夫
而變位也

吉則史黷筮史兼執筮與卦以告于主人占曰從
既筮又釋筮于所筮之處至是乃就而黷之也黷筮
而兼與卦執之以告此亦與士禮異者也

乃官戒宗人命滌宰命為酒乃退

注曰滌漑濯祭器埽除宗廟

繼公謂官戒謂某官戒某人以某事也宰宗人乃官
之尊者故見其所命者以明之有司羣執事之位當
在門東東上大夫之宗人亦私人為之自此以下諸

官司馬之屬皆放此

若不吉則及遠日又筮日如初

注曰遠日後丁若後已

繼公謂此遠日對筮之日而言即所筮不吉之日也
至此日又筮旬有一日也此文當承占曰從之下欲
終言上事故至是乃見之

右筮日

宿

宿謂宿賓以下也是亦官宿之大夫於助祭之賓為踰等故不親宿此宿當在宿尸之後言於此者為下文節也

前宿一日宿戒尸

宿戒尸者凡可為尸者皆宿戒之為將筮也此宿戒蓋亦使人為之尸未筮則未成其尊宿前一日又宿戒尸亦尊者之禮異也

明日朝筮尸如筮日之禮命曰孝孫某來日丁亥用薦

歲事于皇祖伯某以某妃配某氏以某之某為尸尚饗

筮卦占如初

朝如字

不前期三日而筮尸未詳此筮日筮尸之辭皆不言
筮之亦與士異

吉則乃遂宿尸祝擯

祝為擯與上篇祝致命之意同

主人再拜稽首

不待其許諾而即再拜稽首亦異於士已上之儀當

略與特牲同以其有成禮故略之而不言

祝告曰孝孫某來日丁亥用薦歲事于皇祖伯某以某妃配某氏敢宿

注曰告尸以主人為此事來宿

尸拜許諾主人又再拜稽首主人退尸送揖不拜

主人拜而后致辭故尸答拜而后許諾尸所以答拜者亦以其未許諾故也主人又拜者所以見其不必答已尊之又此主人退尸雖不拜送猶揖之凡尸與

主人為禮於其家者皆變於賓主之儀

若不吉則遂改筮尸

所改筮者嗣尸也此所筮者若又不吉則直以其次者為尸不復筮與筮日之意同

右筮尸宿尸

既宿尸反為期于廟門之外

注曰期祭期也言既宿尸反為期明大夫尊宿尸而已其為賓及執事者使人宿之

繼公謂既宿尸反而為期是其事相繼而不必至夕也然則鄉所宿者皆不在可知大夫宿與為期同日此時又未有賓皆大夫禮異者也

主人門東南面

主人門東南面有司羣執事之位北面大夫宜鄉之亦大夫禮異也

宗人朝服北面曰請祭期主人曰比於子

比略志反

注曰比次早晏在於子也

宗人曰旦明行事主人曰諾

注曰旦明旦日質明

乃退

惟云乃退是主人不送也下篇云衆賓出主人拜送于廟門外此退而不送則衆賓不在可知既退有司乃宿賓

右為期

明日主人朝服即位于廟門之外東方南面宰宗人西

面北上牲北首東上司馬刲羊司士擊豕宗人告備乃

退

刲苦
圭反

注曰刲擊皆謂殺之此實既告備乃殺之文互者省也

繼公謂東方視殺之位亦宜當塾少南此異宰宗人之位亦與特牲異宗祝之位者同意牲亦當在東方少南有司牽羊豕則東之而東足也乃退謂主人

右視殺

雍人概鼎匕俎于雍爨雍爨在門東南北上

注曰雍爨羊豕魚腊竈也

繼公謂概猶拭也既筮日而宗人命滌則有司於祭
器皆已濯之矣故至此但概之為去塵也鼎匕俎皆
牲器故雍人概之於雍爨之上以其類也下文概甑
甑匕敦于廩爨其義亦然雍人見公食禮

廩人概甑甑匕與敦于廩爨廩爨在雍爨之北

甑于孕反甑魚

展反敦音對下並同

注曰匕所以匕黍稷者也

疏曰冬官陶人職云甗實二鬴厚半寸脣寸七穿

繼公謂廩人與雍人對言則是掌為饌之事者也甗如甑蓋有底而無孔所以盛米也與甗則炊之匕則出之此四器與鼎匕俎皆陳于外故雍人廩人分擬之廩爨亦北上

司宮擬豆籩勺爵觚觶几洗篚于東堂下勺爵觚觶實

于篚卒概饌豆籩與篚于房中放于西方設洗于阼階

東南當東榮

放方
往反

司宮主陳設此器故俱概之勺爵觚觶概之則隨實
于篚不待其卒概也勺亦實于篚者為將洗之饌之
蓋於北堂放于西方以次而西也下篚亦饌于房以
俟事至而設之不言陳几之處未詳其所特牲禮几
席陳于西堂

右概器

羹定雍人陳鼎五三鼎在羊鑊之西二鼎在豕鑊之西
三鼎羊魚腊二鼎豕與膚膚鼎亦在豕鑊西者以膚
在豕鑊故也魚腊自有鑊未升之時其鼎乃從羊者
以膚鼎從豕之故而為之也蓋此鑊四而鼎五若鼎
各從其鑊則豕鑊西之鼎二羊鑊西之鼎一嫌其輕
重失次故以魚腊之鼎從羊見其尊也不云爨而云
鑊據鼎實之所從出者而言是篇獨著鑊西之鼎位
以其異也士禮三鼎無嫌故不見之

司馬升羊右脾髀不升肩臂臑膊髀正脊一脰脊一橫
脊一短脅一正脅一代脅一皆二骨以並腸三胃三舉
肺一祭肺三實于一鼎

膊音純與肱
同脰他頂反

注曰肩臂臑肱骨也膊髀股骨也脊從前為正脅旁
中為正祭肺三為尸主人主婦

繼公謂升謂升於鼎也牲體盡在鑊惟神之俎實升
於鼎其餘則皆自鑊升於俎也正脊之屬用二骨乃
皆云一者則是但以其名相別耳不繫其骨之多寡

也脊先脅先後亦禮貴相變也腸三胃三者少牢之俎五而已腸胃不得別俎故但附於其牲也附於其牲則其數貶焉而止於三亦如特牲豕俎膚三之意也大夫或用大牢而俎若九若七則腸胃別俎得充其數此制於公食大夫禮見之

司士升豕右脾髀不升肩臂臠膊骼正脊一脰脊一橫脊一短脅一正脅一代脅一皆二骨以並舉肺一祭肺三實于一鼎

此與上經升羊者皆出自鑊而入于鼎其文之序則始於肩終於肺與下經之出於鼎而載於俎者同以其出入先後之節攷之似正相反然則此所云者但據其已在鼎者上下之次而言非謂入鼎之序亦然也蓋與下經之文雖同而意則異矣

雍人倫膚九實于一鼎

注曰倫擇也膚脅革肉擇之取美者

繼公謂膚九者與其牲異鼎不視腸胃故得充其數

焉司士不倫膚以其卑也先魚腊實之者與牲體同
鑊宜因便也既實則遷之於腊爨之西南

司士又升魚腊魚十有五而鼎腊一純而鼎腊用麋
云又升則司士即鄉之升豕者也然則此時亦先升
魚後升腊與鼎謂實于一鼎也牲一胖而腊一純亦
大夫禮異也不言髀不升可知也每於將升之時則
舉鼎以就其鑊西他篇言腊者皆不言其物而此云
用麋者經特於此見之乎

卒胥皆設局鼎乃舉陳鼎于廟門之外東方北面北上
陳於東方亦當塾少南鼎不陳於此亦異於士

司宮尊兩甒于房戶之間同櫨皆有冪甒有玄酒
櫨即所謂櫨禁也惟言櫨文省耳設尊即加冪者甒
其無蓋與

司宮設壘水于洗東有枓設篚于洗西南肆

枓音主

注曰枓盥水器也

繼公謂枓者沃盥與洗用之加于壘上經言壘水者

惟此與大射燕禮耳然則士之水器其異於此乎凡
沃洗及盥于洗者皆用料經特於此見之

改饌豆籩于房中南面如饋之設實豆籩之實

注曰改更也如饋之設如其陳之左右也饋設東面
繼公謂改饌乃就而實之大夫禮異也此亦司宮主
為之 案注云饋設東面以見其異者此耳

小祝設槃匱與簞巾于西階東

其設如士虞禮惟異處耳

主人朝服即位于阼階東西面

更言朝服者嫌祭服或異於前也阼階東亦直東序後放此主人既視殺而退至是乃出立于其位也

司宮筵于奧祝設几于筵上右之

司宮不設几以祝接神宜使其為尊者公食大夫禮司宮設几

右實鼎陳設器饌即位

主人出迎鼎除鼎士盥舉鼎主人先入

注曰道之也主人不盥不舉

繼公謂主人未入室而先迎鼎且不舉亦大夫禮異也除鼎示有事也士盥於外

司宮取二勺于篚洗之兼執以升乃啓二尊之蓋幕奠于楹上加二勺于二尊覆之南枋覆方服反

二尊兩甌也蓋幕蓋尊之幕也此時即徹幕而加勺亦變於士

鼎序入雍正執一匕以從雍府執四匕以從司士合執

二俎以從司士贊者二人皆合執二俎以相從入

相如字

雍正雍人之長府其佐也匕先俎後變於君禮也贊者二人故云相從嫌並行也

陳鼎于東方當序南于洗西皆西面北上膚為下匕皆加于鼎東枋

注曰南于洗西陳于洗西南

繼公謂膚為下陳鼎于外之時則然矣見於此者蓋要終言之必言膚為下者以其出於豕且與之同饌

嫌宜在魚腊上也加匕東枋便匕者之執也既錯鼎加匕則右人及執匕者退惟左人待載

俎皆設于鼎西西肆所俎在羊俎之北亦西肆

注曰所俎在北將先載也異其設文不當鼎

繼公謂後言所俎亦以設在後也執俎者既設俎乃退

宗人遣賓就主人皆盥于洗長匕

長知
丈反

注曰主人不匕言就主人者明親臨之

繼公謂此所遣者二佐食三司士也云賓者省文耳
此佐食賓也司士私人也就主人謂立于主人之南
西面也既乃序盥復位乃序進也云長也則也者
亦有先後矣此禮舉者也者異人亦大夫禮異

佐食上利升牢心舌載于胾俎心皆安下切上午割勿
沒其載于胾俎末在上舌皆切本末亦午割勿沒其載
于胾橫之皆如初為之于爨也

注曰牢羊豕也安平也平割其下於載便也午割使

可絕也勿沒為其分散也今文切皆為刳

疏曰皆者皆羊豕羊豕皆有心舌也案特牲記云所
俎心舌皆去本末午割之實于牲鼎載心立舌縮俎
即是未入鼎時則制此心舌然也既未入鼎先制之
是為之于爨也

繼公謂此羊豕之心舌蓋俱在羊鼎故惟上利升之
勿沒者不絕其中央也必切上下本末者欲其整也
特牲記云舌縮俎此云橫之蓋於俎為縮於載者為

橫然則胙俎亦有執之以載者明矣皆如初為之於
爨者言此切割之制與為之於爨之時無以異也心
舌載於俎皆二以並羊左而豕右與此載者蓋南面
以羊俎在
其南也

佐食遷胙俎于阼階西西縮乃反

胙俎既載則執俎者以錯于故處而佐食遷之也西
縮猶西肆

佐食二人上利升羊載右胖髀不升肩臂臠膊骼正脊

一脰脊一橫脊一短脅一正脅一代脅一皆二骨以並
腸三胃三長皆及俎拒舉肺一長終肺祭肺三皆切肩
臂臑膊髂在兩端脊脅肺肩在上

疏曰云肩臂臑膊髂在兩端脊脅肺肩在上者此是
在俎之次俎有上下猶牲體之有前後故肩臂臑在
上端膊髂在下端脊脅肺在中其載之次序肩臂臑
正脊脰脊橫脊代脅長脅短脅肺腸胃膊髂也

繼公謂此先言其出於鼎之序後言其載於俎之次

也出於鼎者其序如此則其在鼎上下之次亦可見矣拒未詳脊脅肺不言腸胃可知也或曰肺上當有腸胃二字文脫耳凡吉禮之大牲其俎實體骨之名與其出鼎及載之次見於此

下利升豕其載如羊無腸胃體其載于俎皆進下

注曰進下變於食生也鄉飲酒禮進膳羊次其體豕言進下互相見

繼公謂進下謂以每體之下鄉神位也載時則但為

鄉俎之右耳

司士三人升魚腊膚

升之每俎異人亦變於初也

魚用鮒十有五而俎縮載右首進腴

注曰右首進腴亦變於食生也

繼公謂縮載謂載而縮俎也右首據載者視之而言也魚之進腴猶牲之進下也魚以腴為下髻為上右首而進腴則亦寢右矣士喪奠用食生之禮其魚則

左首進箸與此異又喪奠魚九而為三列此其列亦三而每列用五與

腊一純而俎亦進下肩在上

注曰如羊豕

繼公謂腊一純而俎則肩臂臠膊髀各二而脊脅之數亦倍於牲其載之次左右股肱皆二體以並而右為上凡腊之體骨及載亦見於此

膚九而俎亦橫載革順

注曰列載於俎令其皮相順亦者亦其骨體

繼公謂上俎云進下即橫載也故此亦之橫載者載而橫於俎也

右陳鼎匕載俎

卒胥祝盥于洗升自西階主人盥升自阼階祝先入南面主人從戶內西面

祝先升亦大夫禮異也祝南面負墉

主婦被綈衣侈袂薦自東房韭菹醯醢坐奠于筵前主

婦贊者一人亦被緗衣侈袂執葵菹羸醢以授主婦主婦不興遂受陪設于東韭菹在南葵菹在北主婦興入

于房

緗並音冢
羸音螺

被如被衿衣之被謂衣之也緗皆當作緣字之誤也緣祿通內司服曰緣衣素沙是也內子祭服緣衣而又侈其袂焉所以甚別於士妻之祭服也卿大夫之妻展衣為上祿衣次之此自祭於家故服其次者辟助祭於公也不言首飾其亦纚笄與贊者亦被祿衣

侈袂婦人助祭者其服宜與主婦同亦如賓客之皆朝服也然則雖非內子其衣亦得侈袂矣古者男女吉凶之衣其袂二尺二寸袪一尺二寸此制之正也侈袂之度則未詳主婦贊者云一人見其數止於此耳以授主婦坐授之也故主婦不興上不言主婦之位此不言盥如特牲可知大夫尊亦得用朝事之豆籩乃於此禮惟用其二豆者遠下君禮也國君之豆籩惟所用之而皆自其上者始

佐食上利執羊俎下利執豕俎司士三人執魚腊膚俎
序升自西階相從入

此執俎皆匕者也不使載者設之亦大夫祭禮異也
設俎羊在豆東豕亞其北魚在羊東腊在豕東特膚當
俎北端

當豕俎北端乃云特者明不與之為列也

主婦自東房執一金敦黍有蓋坐設于羊俎之南婦贊
者執敦稷以授主婦主婦興受坐設于魚俎南又興受

贊者敦黍坐設于稷南又興受贊者敦稷坐設于黍南
敦皆南首主婦興入于房

金敦以金飾之也四敦皆然特見其一耳婦贊者即
主婦贊者一人也不言主省文也後放此以授主婦
立授之也故主婦興受敦與受豆籩不同禮貴相變
也其後二敦則婦人贊者執以立于戶外婦贊者一
一反之以授于主婦蓋婦贊者惟一人而已敦南首
是北足也士喪禮曰敦啓會面足敦從設之首足異

鄉蓋有所象也但其制則不可得而攷矣執敦者面足而此設之南首則是設敦者亦鄉席為之如設豆之面位矣

祝酌奠遂命佐食啓會佐食啓會蓋二以重設于敦南

重直
容反

注曰特牲饋食禮曰祝洗酌奠重累之

繼公謂已酌奠即奠之於韭菹之南而東當所設會之西此文省也設于敦南卻而設于其南兩敦之南

也云會復云蓋以明會之為蓋也

主人西面祝在左主人再拜稽首祝曰孝孫某敢用柔毛剛鬣嘉薦普淖用薦歲事于皇祖伯某以某妃配

某氏尚饗主人又再拜稽首

祝祝下之又反淖女孝反

主人固西面矣復見之者嫌此時或異面也羊曰柔毛

右設饌祝神

祝出迎尸于廟門之外主人降立于阼階東西面祝先

入門右尸入門左

注曰特牲饋食禮曰尸入主人及賓皆辟位出亦如之祝入門右者辟尸盥也既則後尸

宗人奉槃東面于庭南一宗人奉匱水西面于槃東一宗人奉簞巾南面于槃北乃沃尸盥于槃上卒盥坐奠簞取巾興振之三以授尸坐取簞興以受尸巾

奉並芳勇反

注曰庭南沒雷

繼公謂庭南於入門左之位為少北於此俟之亦異

於士

祝延尸尸升自西階入祝從

特牲饋食禮曰尸至于階祝延尸祝從從其升而入也祝入亦南面

主人升自阼階祝先入主人從

上云尸入祝從則祝固已入矣此復云祝先入者明其先於主人

右尸入

尸升筵祝主人西面立于戶內祝在左

注曰祝從尸尸即席乃卻居主人左

繼公謂在左者當為主人釋妥尸之辭也在左之義見聘禮

祝主人皆拜妥尸尸不言答拜遂坐

注曰尸自此答拜而卒食其間有不啐奠不嘗鉶不告旨大夫之禮尸彌尊也

繼公謂云尸不言則妥有辭矣尸於既拜乃坐亦變

於士所以升筵而未即坐者以主人尊故也

祝反南面

注曰未有事也墮祭爾敦官各肅其職不命

繼公謂妥尸事畢也南面云反以見從尸入時位在此不饗亦大夫禮異案注云墮祭亦誤墮宜作授

尸取韭菹辯換于三豆祭于豆間上佐食取黍稷于四敦下佐食取牢一切肺于俎以授上佐食上佐食兼與

黍以授尸尸受同祭于豆祭

辯音徧下並同換如悅反

牢一切肺羊豕各一也言兼與黍而不言稷見其尊者耳或曰黍下脫一稷字同猶兼也豆祭豆實所祭之處

上佐食舉尸牢肺正脊以授尸上佐食爾上敦黍于筵上右之

注曰右之便尸食也重言上佐食明更起不相因繼公謂此於所舉者皆繫以尸明其為尸物也肺脊先食舉之亦明不與他舉同重言上佐食者授舉之

後尸有事也不言振祭嘑之文省耳右之蓋當尸前之南案注云右之便尸食謂黍在尸右則尸以右手取之便也

主人羞所俎升自阼階置于膚北

羞進也云升自阼階者嫌進俎者必升自西階故以明之置亦橫設之也

上佐食羞兩鉶取一羊鉶于房中坐設于韭菹之南下佐食又取一豕鉶于房中以從上佐食受坐設于羊鉶

之南皆芼皆有柶尸扱以柶祭羊鉶遂以祭豕鉶嘗羊
鉶

注曰芼羊用苦豕用薇皆有滑

繼公謂上佐食受興受之也故下云坐設芼以菜和
物之名祭鉶亦於豆祭也下篇曰以羊鉶之柶扱羊
鉶遂以扱豕鉶祭于豆祭若公食大夫禮用太牢則
祭鉶于上鉶之間與此異

食舉

特牲饋食禮曰乃食食舉謂一飯則食舉以安之也
士昏禮亦然則此亦當先飯而後食舉也不言乃食
者文有脫漏也

三飯上佐食舉尸牢幹尸受振祭噉之佐食受加于所
上佐食羞載兩瓦豆有醯亦用瓦豆設于薦豆之北

扶飯

晚反下
並同

注曰設于薦豆之北以其加也四豆亦絳羊載在南
豕載在北

繼公謂薦豆魚二列而言也無臠臠其遠別於太牢之禮與禮用太牢庶羞乃有腳臠臠案注云羊豕在南豕豕在北者謂羊在西列之南豕在東列之北也

尸又食食載上佐食舉尸一魚尸受振祭饗之佐食受加于所橫之

注曰魚橫之者異於肉

繼公謂尸食載亦異於士橫之象其在魚俎也此亦

於俎為縮於人為橫然則佐食於加物于胙俎之時
其亦西面與賓尸並送之俎皆於羊俎南載之與此
禮同

又食上佐食舉尸腊肩尸受振祭噉之上佐食受加于
胙

注曰腊魚皆一舉者少牢二牲略之腊必舉肩以肩
為終也

繼公謂肩右肩也骨體惟肩為尊腊但一舉故即用

其尊體也別舉魚腊大夫禮異也此言上佐食受則前後所謂佐食受者皆其上者也

又食上佐食舉尸牢醑如初

注曰如舉幹也

又食尸告飽祝西面于主人之南獨侑不拜侑曰皇尸未實侑

注曰實猶飽也祝既侑復反南面

繼公謂侑尸之禮祝固不拜矣乃言之者嫌主人不

拜祝獨侑則或當拜也祝獨侑亦與士禮異

尸又食上佐食舉尸牢肩尸受振祭饔之佐食受加于
所

三舉骨體始於幹終於肩亦自卑而尊也此禮或三
飯而舉或一飯二飯而舉又別其魚腊各自為舉數
皆與士異也

尸不飯告飽祝西面于主人之南

注曰祝當贊主人辭

繼公謂不飯而告飽又變於上

主人不言拜侑

祝為之辭故不言也

尸又三飯

注曰為祝一飯為主人三飯尊卑之差凡十一飯士九飯

繼公謂於舉肩之後又三飯為主人加也

上佐食受尸牢肺正脊加于所

言受明尸未嘗奠之也特牲禮既舉幹魚尸實舉于菹豆故食畢佐食自舉加于所與此禮異佐食亦反上敦黍于其所經文略也

右尸食

主人降洗爵升北面酌酒乃酹尸尸拜受主人拜送云北面酌酒見凡酌於此者之面位也尊東西設勺南枋而北面酌之則非酌於此者其面位亦可得而推矣

尸祭酒啐酒賓長羞牢肝用俎縮執俎肝亦縮進末鹽

在右

長知丈反
下並同

注曰鹽在肝便尸換之

繼公謂此縮執俎者執其左右廉也肝進末即體進下之意鹽在肝右則羊肝在豕肝之左與祭禮進末則昏禮之肝從當進本也

尸左執爵右魚取肝換于俎鹽振祭棼之加于菹豆卒爵主人拜祝受尸爵尸答拜

魚魚羊豕也於尸未受爵而主人拜故祝亦不相爵
皆大夫禮異也下凡與特牲異者皆放此不悉見之

右主人醕尸

祝酌授尸尸醕主人主人拜受爵尸答拜主人西面奠

爵又拜

醕才各反與酢同下不見之

初拜固西面矣此言之者著受爵而反位也主人受
酢而俠拜亦大夫禮異也

上佐食取四敦黍稷下佐食取牢一切肺以授上佐食

上佐食以綏祭

綏當亦作授

注曰右受佐食右手受祭於佐食也

繼公謂言坐祭之者凡奠爵拜者執爵興故至此云坐也

祝與二佐食皆出盥于洗入

三人皆為將執所嘏之物而盥敬其事也

二佐食各取黍于一敦上佐食兼受搏之以授尸尸執以命祝

注曰命祝以嘏辭

繼公謂各取黍上者取于上敦下者取于下敦黍之上敦在西下敦在東

卒命祝祝受以東北面于戶西以嘏于主人曰皇尸命工祝承致多福無疆于女孝孫來女孝孫使女受祿于天宜稼于田眉壽萬年勿替引之

女並音汝
來如字

注曰工官也承猶傳也耕種曰稼勿猶無也替廢也引長也言無廢止時長如是也

繼公謂受受黍也東北面鄉主人于戶西者為尸致
嘏宜近尸也來如來禹之來來之者欲其進而受黍
也

主人坐奠爵興再拜稽首興受黍坐振祭嚌之詩懷之
實于左袂挂于季指執爵以興坐卒爵執爵以興坐奠
爵拜尸答拜執爵以興出宰夫以籩受盥黍主人嘗之

納諸內

卦挂音

注曰出出戶也納猶入也

繼公謂云坐奠爵是立聽嘏也興少進受黍復位乃坐祭嘑之也宰夫受黍主人左執爵乃取而嘗之而納之內謂遷中既嘑之復嘗之亦大夫禮異也此嘏禮詳於特牲者大夫尊尚多儀也

右尸酢主人

主人獻祝設席南面祝拜于席上坐受

亦先設席乃酌獻之

主人西面答拜

答拜即拜送也

薦兩豆菹醢

薦者亦宰夫也下篇云主婦獻祝宰夫薦棗糗此宜如之菹醢謂韭菹醢醢也蓋祝籩以尸之上籩則其豆亦當以尸之上豆也不賓尸禮主人主婦之薦皆以韭菹醢醢則此可知矣其設之亦菹在西醢在東佐食設俎牢髀橫脊一短脅一腸一胃一膚三魚一橫之腊兩髀屬于尻

屬音燭尻若力反

髀右髀也橫脊短脅不二骨者俎實已多故此略之
魚橫之亦據人而言也其義與加于所者同牢皆用
右髀腊兩髀不殊皆取尸俎之不用者耳腊亦髀者
與牲並用故體亦放之祝俎一而已乃雜用五俎之
物者見其尊也不賓尸之禮主人主婦俎亦然
祝取菹換于醢祭于豆間祝祭俎

注曰大夫祝俎無肺祭用膚遠下尸

繼公謂祭俎取膚以祭也亦振祭瘠之既則反之於

俎士虞餞尸以乾肉半尹為祭其祭之也振祭瘠之
反之此膚乃俎實異於豆祭不可以置于地其儀當
與乾肉之祭同不言振祭瘠之亦文省耳

祭酒啐酒肝牢從祝取肝換于鹽振祭瘠之不興加于
俎

肝牢當作牢肝俎牲俎也

卒爵興

注曰亦如佐食授爵乃興

主人酌獻上佐食上佐食戶內牖東北面拜坐受爵主人西面答拜

取節於牖見其少西於其他之北面拜者也凡室中北面拜者皆在戶牖間其言戶西者則近於戶言牖東者則近於牖

佐食祭酒卒爵拜坐授爵興

拜蓋衍文祝與佐食皆不拜既爵者遠下戶亦大夫禮異也佐食興則出立于戶外士虞記曰佐食無事

則出戶負依南面

俎設于兩階之間其俎折一膚

下篇獻衆賓以至於私人皆有薦胥佐食在衆賓之中又有上事不宜貶於私人但有胥而無薦此不云薦亦似文略也又不賓尸之禮云其獻祝與二佐食其位其薦胥皆如儼然則此佐食有薦明矣折說見前篇記

主人又獻下佐食亦如之其胥亦設于階間西上亦折

一膚

卒獻則主人受爵以實于下筐而升復位特牲饋食
禮曰佐食卒角主人受角降反于筐

右主人獻祝及佐食

有司贊者取爵于筐以升授主婦贊者于房戶

筐下筐也主婦亞獻用下筐之爵豈此時內筐未有
爵與婦人不可以取爵于庭故有司為取之戶字誤
若授受於戶當言內外西東不宜單言也下篇曰司

宮取爵于篚以授婦贊者于房東此戶亦當為東與婦贊者受以授主婦主婦洗于房中出酌入戶西面拜獻尸

注曰入戶西面拜由便也

尸拜受主婦主人之北西面拜送爵

注曰此拜於北則上拜於南矣

尸祭酒卒爵主婦拜祝受尸爵尸答拜易爵洗酌授尸尸不啐而卒爵為無從也易爵易于下篚也醋而易

爵亦內子禮異也下篚在洗西故因易爵而洗之也
凡尸酢不洗賓尸乃或有之

主婦拜受爵尸答拜

主婦受酢不夾爵拜亦變於不賓尸之禮

上佐食綏祭主婦西面于主人之北受祭祭之其綏祭
如主人之禮不嘏卒爵拜尸答拜

注曰不嘏夫婦一體

繼公謂綏亦當作授其授祭謂所取及相授者也士

妻撫祭內子受祭又有于房于室之異皆相變也主婦既祭又祭酒乃卒爵下篇曰主婦立卒爵執爵拜主婦以爵出贊者受易爵于筐以授主婦于房中

注曰贊者有司贊者也

繼公謂贊者與主婦親授受亦變於初此易爵于下筐則內筐初無爵明矣易爵于下筐乃不洗者辟祝為尸易爵之禮也

右主婦獻尸尸酢

主婦洗酌獻祝祝拜坐受爵主婦答拜于主人之北卒爵不興坐授主婦

主婦必洗者為贊者終其事也獻祝可以不洗

主婦受酌獻上佐食于戶內佐食北面拜坐受爵主婦西面答拜祭酒卒爵坐授主婦主婦獻下佐食亦如之主婦受爵以入于房

注曰不言拜于主人之北可知也爵奠于內篚

繼公謂上云主人之北此云西面上云不興此云祭

酒皆互見也

右主婦獻祝佐食

賓長洗爵獻于尸尸拜受爵賓戶西北面拜送爵尸祭酒卒爵賓拜祝受尸爵尸答拜祝酌授尸賓拜受爵尸拜送爵賓坐奠爵遂拜執爵以興坐祭遂飲卒爵執爵以興坐奠爵拜尸答拜

賓受酢而俠拜與夫奠爵拜執爵興之類皆放主人事尸之禮為之

右賓獻尸尸酢

賓酌獻祝祝拜坐受爵賓北面答拜祝祭酒啐酒奠爵于其筵前

不卒爵故啐而奠之筵前席南也蓋北面奠之奠於此者明其與他奠爵之禮異祝不卒爵又不及佐食蓋放不賓尸末獻之儀也

右賓獻祝

主人出立于阼階上西面祝出立于西階上東面祝告

曰利成

階上亦皆序內也

祝入尸謖主人降立于阼階東西面祝先尸從遂出于
廟門

祝先尸而行也其出戶降階及門之時亦皆鄉尸
而還略如士虞記所云也尸出廟門祝宜告以主人
將有事則尸於門外次中俟之士冠禮曰請醴賓賓
就次

祝反復位于室中主人亦入于室復位祝命佐食徹所
俎降設于堂下阼階南

徹直
列反

徹所俎不出門示將賓尸之意也不賓尸之禮尸出
則佐食出尸俎于廟門外有司受歸之所俎而以賓
尸者賓尸之俎宜俱用尊體所俎有肩髀之屬在焉
不得不於是乎取之也終以歸尸故無嫌佐食亦上
佐食也阼階南近於鄉者所升之處也

右尸出祭禮畢

司宮設對席乃四人養上佐食盥升下佐食對之賓長
二人備

注曰備四人餽也三餽亦盥升

繼公謂賓長二人謂長賓及衆賓長也此佐食皆異
姓也故可使賓長對之案注知三餽亦盥升者以
特牲禮舉奠及長兄弟盥而推之也

司士進一敦黍于上佐食又進一敦黍于下佐食皆右
之于席上

注曰右之者東面在南西面在北

資黍于羊俎兩端兩下是餽

注曰資猶減也減置于羊俎兩端則一賓長在上佐食之北一賓長在下佐食之南

繼公謂資字未詳兩端當肩髀之處也羊俎兩端其於兩下亦皆為右兩下是餽謂二賓長以此黍餽也餽主於二佐食故以二賓長為兩下

司士乃辯舉饗者皆祭黍祭舉

辨舉舉膚以授四人膚即在特俎者

主人西面三拜養者養者奠舉于俎皆答拜皆反取舉
注曰三拜旅之也

繼公謂西面於其位也言此者明其不為二人西面
而易位拜之也奠舉于俎亦各於其所近者與皆答
拜答一拜也養者答拜無異文則是西面者亦西面
拜矣反取舉復取舉于俎也言反者為其擲者亦在
手也

司士進一鉶于上養又進一鉶于次養又進二豆滫於兩下乃皆食食舉

兩下資黍於俎又有滫無鉶皆下立養者也此二佐食衆賓也兩下賓長也養則佐食反尊於賓長者以其勞於室事故報禮特重焉祝不養者按神職尊不敢使之養也二鉶上養羊下養豕然則二豆滫亦羊豕各一與

卒食主人洗一爵升酌以授上養替者洗三爵酌主人

授于戶內以授次養若是以辯皆不拜受爵主人西面
三拜養者養者奠爵皆答拜皆祭酒卒爵奠爵皆拜主
人答一拜

贊者蓋亦宰夫也每於將酌乃洗爵云洗三爵總言
之耳若是謂酌受授也辯及于兩下也皆不拜受爵
者人多重勞主人一一答之也養者奠爵拜亦與士
異答一拜卒爵禮輕可以略特牲二人養其禮亦然
凡大夫士之禮其答卒爵拜者皆一拜也乃見之者

嫌人多或旅之也

養者三人興出

注曰出降反其賓位

繼公謂不執爵以出統於上養也

上養止主人受上養爵酌以醋于戶內西面坐奠爵拜
上養答拜

注曰主人自醋者上養獨止當尸位尊不酌也

坐祭酒啐酒

主人啐酒者為聽嘏凡既祭酒而未得即卒爵者必啐酒

上養親嘏曰主人受祭之福胡壽保建家室

上養親嘏且不用黍惟以辭別於尸也胡如胡福之胡

主人興坐奠爵拜執爵以興坐卒爵拜

重嘏故其禮盛至是乃云主人興是坐而聽嘏也亦殺於尸

上養答拜上養興出主人送乃退

云上養興出則是不受主人爵也主人奠爵上養不受示禮有終且為有司將徹之也出亦謂出戶送謂送之於戶外退者上養退立于賓位也賓以出為退主人以入為退

右養

儀禮集說卷十六